

## **Bhaluwa ja Ntai ja a Pauli kwa a Timoteo Shilongolelo**

Shitabhu sha ntai sha Timoteo ni bhaluwa ja-jandikwe na a Ntume a Pauli kwenda kwa bhaak-agula bhabho a Timoteo. Shene shitabhushi pushajandikwe yaka ya 62-64 AD, mobha ga tome kuwa kwabho. A Pauli bhashinkumajigana ukoto na a Timoteo na guna pubhaashemaga bhanabhabho (Phil. 2:22).

Jeneji ni bhaluwa ja munkumbi gwa bhaluwa nsheshe ya a Pauli itumbililwe kuka mundu kuleka itumbililwe ku likanisha ila. Bhaluwa itatu ina ni, bhaluwa jabhili ja a Timoteo na a Tito na a Pilimoni. Bhaluwa ja ntai ja a Timoteo jinajiganya namuna ja kwaatindibhalila a Nnungu nnikanisha (2:1-15), na ipinjikwa kwa ashikalongolele bha likanisha (3:1-13), na maleyo ga bhaajiganyanga indu ya unami (1:3-11, 4:1-5, 6:2-5). Yenei inalangula a Pauli shibhaajiganyaga a Timoteo kubha akalongolele munkumbi gwa makanisha. Shitabhu sha Bhaluwa ja ntai ja a Timoteo shishikola miungu jamigwinji ja kwaajangutilanga ashikalongolele bha makanisha ga gegano mobha gano namuna ja longoya makanisha gabhonji.

### **Ipali Mwenemo**

1. A Pauli bhanatandubha kwa kwaalamushila a Timoteo (1:1-2).
2. Alapu a Pauli bhakwaleya a Timoteo ga bhaajiganyanga bha unami (1:3-11).

3. A Pauli bhanapunda katalashiya shibhakuti kwaatendela eja a Yeshu (1:12-19).
4. Na kabhili a Pauli bhakwaalanguya a Timoteo namuna ja kwaatindibhalila a Nnungu na ipinjikwa kwa ashikalongolele bha likanisha.
5. A Pauli bhanamalishiya bhaluwa jabho kwa kwaapa a Timoteo majiganyo ga kumpelo (4-5).

<sup>1</sup> Nne Pauli ntume jwa a Yeshu Kilishitu, kwa pinga kwabho a Nnungu Bhaatapula na a Yeshu bhali ngulupalilo yetu. <sup>2</sup> Ngunakunnjandishila mmwe a Timoteo mmanangu bha kweli nngulupai.

Ngunakunnjujila nema na shiya na ulele, kukopoka kwa Atati a Nnungu, na a Yeshu Kilishitu Bhakulungwa bhetu.

### *Kuleya ga Majiganyo ga Unami*

<sup>3</sup> Ngunaapinga ntame ku Epesho, malinga shinnanshondelesheye punajendaga ku Makedonia, nkupinga mwaalimbiyanje bhandunji bhaajiganyanga majiganyo ga unami, <sup>4</sup> wala bhanakagulilanje ndango yangali malombolelo, na nndon-donga gwa mena ga bhanyikala, gwangali mpelo, ikumbuya mitau na wala ikakwaajangutilanga bhandunji nngulupai. <sup>5</sup> Kwa nneyo, shitumbililwe kwa gene malajiloga, nikwaakwiyanga bhandunji bhapingananje, kwa ntima gwa mmbone, na ng'aniyo ya muntima ili ya mmbone, na ngulupai yangali ugulumba. <sup>6</sup> Bhandu bhananji bhashipuganikanga ni tendebhushila malobhe gangali ga mmbone. <sup>7</sup> Bhanapinganga kubha

bhaajiganya bha malajilo ga a Musha, ikabheje bhakakugamanya malobhe gubhaabheleketanga, wala ibhakong'ondelanga.

<sup>8</sup> Tumumanyi kuti shalia ja a Musha ni ja mmbone, ibhaga mundu shaakagulile kwa aki. <sup>9</sup> Ikabheje tukumbushile kuti, shalia jangabhikwa kwa ligongo lya bhandunji bhanguja, ikabhe kwa ligongo lya bhandunji bhaatendanga yangali ya mmbone, na bhakaakundanga, na bhakakwaishimiyanga a Nnungu, na bhakwetenje yambi, na bhandunji bhanyatiyanga indu ya ukonjelo pa shilambolyo, na bhandunji bhakwaabhlulaganga bhaakwetenje, eu bhaabhlulaganga bhobhowe bhala, <sup>10</sup> shalia jishibhikwa kwa ligongo lya bha labhalabha, na bhaagonana ashaayene, yani, bhanabhalume kwa bhanabhalume, na bhanabhakongwe kwa bhanabhakongwe, bhandunji bhaajibhanga bhandu, na bhandunji bha unami, na bhandunji bhaalumbilanga kwa unami, na bhaatendanga shindu shoshowe shikana malajilo ga kweli. <sup>11</sup> Gene majiganyogo mugaabhoneka, Nngani ja Mmbone ja a Nnungu bha ukonjelo na bha mboka, jimbegwilwe nunguye.

### *Kutenda Eja kwa Shiya sha a Nnungu*

<sup>12</sup> Ngunakwaatendela eja a Yesu Kilishitu bhambele mashili ga kamula liengo lyangu. Ngunakwaatendela eja pabha bhashimona nne kuti najwaakulupalilwa, gubhang'agwile naatendele liengo lyabho, <sup>13</sup> nkali bhukala gula,

natendaga kwaatukana na kwaashima, na kwaatendela nngomo. Ikabheje a Nnungu gubhamonele shiya, pabha ngakweteje ngulupai na ngashimanyaga shingutenda. <sup>14</sup> Ikabheje Bhaklungwa bhetu bhashinkumba nema ja punda, gubhambele ngulupai na pingana, nkulundana na a Yeshu Kilishitu.

<sup>15</sup> Ni lilibhe lya kulupalika kaje, na linapinjikwa liposhelwe kuti, a Yeshu Kilishitu bhashinkwiya pa shilambolyo kukwaatapulanga bhakwetenje ilebho. Na nne, ni napundile kulebha punda bhowenji, <sup>16</sup> ikabheje a Nnungu gubhamonele shiya nkupinga a Kilishitu bhalanguye kwiipililila kwabho kowe mwangu nne naaliji nankulebha kupunda bhowe, nkupinga nne mme jwa langulwa ku bhandunji bhowe, shibhajiye kwaakulupalilanga na poshela gumi gwa pitipiti. <sup>17</sup> Kwa bhenebho bhali a Mpalume bha pitipiti, bhakawa na bhakaabhoneka, bhene bhali a Nnungu jikape, kwa bhenebho jibhe ishima, na ukonjelo pitipiti! Amina.

<sup>18</sup> Mwanangu Timoteo, ngunakupa gene malajilo gano, malinga malobhe gunabhalanjilwe bhukala na ashinkulondola bha a Nnungu. Ugatende gene malobhego gabhe shikomanilo shako nkukomana ukoto ngondo jako. <sup>19</sup> Ukole ngulupai na ng'aniyo ya mmbone. Bhandunji bhana gubhaikanilenje ng'aniyo yabbonji, niobihiya ngulupai yabbonji. <sup>20</sup> Munkumbi gwabbonji bhapalinji, a Imeneyo na a Alekishanda, bhene bhunimpele Lishetani, nkupinga bhaajiganywanje bhanaatukananje a Nnungu kabhili.

## 2

*Malajilo ga Nkwaajuga a Nnungu*

<sup>1</sup> Bhai sha ntai kaje, nnjunganje na tenda eja kwa a Nnungu, kwa ligongo lya bhandunji bhowe, <sup>2</sup> kwa ligongo lya bhapalume, na bhowe bhakwetenje ukulungwa, nkupinga tutame ndamo ja ulele pamo na kwaakuya a Nnugnu, na ndamo ja ukonjelo na gundu. <sup>3</sup> Shene shindushi ni sha mmbone, shikwaanonyela a Nnungu, bhaatapula bhetu, <sup>4</sup> bhaapinga bhandu bhowe bhatapulwanje, na kuimanya indu ya kweli. <sup>5</sup> Pabha bhapali a Nnungu bhamope, na bhapali bhaalundanya bhamo, bhaalundanya bhandu na a Nnungu, ni mundu, a Yeshu Kilishitu, <sup>6</sup> bhene bhaishoshiye bhayene kwaatapulanga bhandu bhowe. Gwenego pugwaaliji ukong'ondelo, gakaishileje malanga gakwe ga pwaa, kuti a Nnungu bhanapinga kwaatapulanga bhandu bhowe. <sup>7</sup> Kwa lyene ligongolyo, njibhikwa kubha ntume, na nkulunguya, na nkujiganya, ku bhandu bhangabha Bhayaudi, ga ntenga gwa ngulupai na kweli. Ngunabheleketa kweli nngabha unami.

<sup>8</sup> Bhai, shingupinga nne, popowe punkuimananga nkujuga, ngunaapinga bhanabhalume bhaajunganje a Nnungu, akuno bhajinwilenje makono gamatakaywe, bhalijuganga gwangali nnjimwa wala mitau. <sup>9</sup> Nneyo peyo, bhanabhakongwe bhawalanje nngubho ya mmbone, na ya shigundu, na ya langula kwiitimalika ntima, na nngabha kwiikelengelela kwa tibha umbo,

wala kwa shaabhu na lulu, eu nngubho ya galama. <sup>10</sup> Ikabheje kwa itendi ya mmbone, malinga shibhaapinjikwanga bhanabhakongwe bhakwaajogopanga a Nnungu. <sup>11</sup> Bhanabhakongwe bhaijiganyanje kwa kwiitimalika, akuno bhalikundanga yowe. <sup>12</sup> Nne nguti, jwankongwe anannjiganye wala kuntagwala jwannume, ikabhe aitimalishe. <sup>13</sup> Pabha a Adamu ni bhatandwibhe kupanganywa, kungai a Awa. <sup>14</sup> Na wala a Adamu bhangatembwa, ikabhe bhakongwe ni bhatembilwe, gubhajinjile muilebho. <sup>15</sup> Ikabheje, bhakongwe shibhatapulwe kwa bheleka bhana, ibhaga shibhalonjeye nngulupai na nkupingana, na ukonjelo, na ntima gwa kwiitimalika.

### 3

#### *Ashikalongolele Nnikanisha*

<sup>1</sup> Ni kweli kuti, mundu apinga kubha kalongolele jwa likanisha, anapinga liengo lya mmbone. <sup>2</sup> Bhai inapinjikwa kalongolele abhe mundu anakole ilebho ku bhandunji, na analombe matala, na abhe jwa kwiluma na jwa ishimika, na jwa lunda, na jwa mituka na akombola kujiganya, <sup>3</sup> nngabha mundu jwa kolelwa na nngomo, ikabhe abhe jwa kwitimalika na jwangali mitau, na anabhe mundu jwa kunnonyela mbiya, <sup>4</sup> mundu akombola kulongoya ukoto bhandu bha likaja lyakwe, na akombola kwaatendanga bhaanagwe bhampikananje na bhakolanje ishma. <sup>5</sup> Pabha monaga mundu akakombola kwaalongoanya ukoto

bhandu bha likaja lyakwe, shakombole bhuli kulilongoya likanisha lya a Nnungu? <sup>6</sup> Na kabhili mundu akanabhe kwiishimilika ukoto nngulupai, anaagulwe kubha kalongolele, nngakabha anakwiipuna niukumulwa malinga shatendilwe Lishetani. <sup>7</sup> Abhe mundu jwa shuma uguja kubhandunji bha kunyenje, nkupinga anagambwe nitanjila nniyau lika Lishetani.

### *Mashemashi Nnikanisha*

<sup>8</sup> Nneyo peyo na mashemashi nnikanisha bhabhanganje bhandunji bha ishimika, na bhanabhanganje bha malobhe malobhe, na bhanabhanganje bha kolelwa, na bhpanganga mmbiya ya tokomaya, <sup>9</sup> bhabhanganje bhaakagulilanga ngulupai ya kweli. <sup>10</sup> Kwa nneyo bhatandubhanje kulingwa, kungai bhatendanje liengo lya jangutila nnikanisha, bhabhonekangaga kuti bhangalinji itendi ya nyata. <sup>11</sup> Nneyo peyo na ashaakongo bhabhonji, bhabhanganje bhaishimikanga, bhanabhanganje bha lung'wenyi, bhabhanganje bhakwiitimalika, na bhaakulupalikanga kwa kila shindu. <sup>12</sup> Mashemashi bhanalombanje matala, numbe bhakombolanje kulongoya ashibhana bhabhonji na makaja gabhonji ukoto. <sup>13</sup> Pabha bhatendanga liengo ukoto nnikanisha, bhanapatanga kushimilika ukoto, nikola mashili ga bheleketa kwa makangala, ga ngulupai yabhonji nkulundana na a Yesu Kilishitu.

### *Shinjubhi Shikulu*

**14** Ngunakunnjandishila gegano, akuno nguliganishiya kuti ngakabha kwiya kweneko.  
**15** Ikabheje monaga ngabhaga kwiya, bhai mmumanyanje shiikupinjikwa bhandu kutama nnikaja lya a Nnungu, yani nnikanisha lya a Nnungu bhakwete gumi, bhalipoto, na nshingi gwa kweli. **16** Bhai, pangali lipamba lyolyowe ga shinjubhi shikulu sha dini jetu,  
A Kilishitu bhakoposhele kwa shiilu sha shigundu,  
gubhakong'ondelwe naka Mbumu jwa Ukonjelo  
kuti bhakwete aki,  
gubhabhoneshe na ashimalaika.  
Gubhalungwiye ku bhandu bha ilambo ina.  
Gubhakulupalilwe pa shilambolyo,  
nigubhanyakwilwe kunani muukonjelo.

## 4

### *Bhaajiganya bha Unami*

**1** Bhai Mbumu anabheleketa gwangali nng'iyo, kuti mobha ga kumpelo bhananji shibhalekanje ngulupai, nikagulila mitima ja unami na majiganyo ga ashimaoka. **2** Gene majiganyogo kugakopoka ku bhandunji bhanami na ugulumba, ng'aniyo ya mmitima jabhonji iangabhanyishe mbuti itiniywe na moto. **3** Bhalikwaalimbiyangga bhandunji bhanalombanje na bhanalyanganje yalya ina. Ikabheje a Nnungu bhashinkwiipanganya yene yalyayo, nkupinga bhakwetenje ngulupai na kuiamanya ya kweli bhala, bhaiposhelanje nikwaatendela eja. **4** Pabha indu yowe

ibhapengenye a Nnungu ni ya mmbone, wala shakwa sha kanwa, monaga shiposhelwaga kwa tenda eja,<sup>5</sup> pabha shishitakaywa kwa lilobhe lya a Nnungu na kwa juga.

### *Ntumishi jwa Mmbone*

<sup>6</sup> Monaga shimwaakumbushiyanje ashaalongo ajenunji genego, shimme ntumishi jwa mmbone jwa a Yesu Kilishitu na nnelilwe kwa malobhe ga kweli ga ngulupai, na majiganyo ga mmbone gunkagulile. <sup>7</sup> Ikabheje mwiileshe ndango ya bhukala yangabha ya dini ya bhanabhakongwe bhakongopa, mwiyyobhelesheye ndamo ja kwaajogopa a Nnungu. <sup>8</sup> Pabha kushiyobhelesheya shiilu kwa ing'ando, kunapwaa kashoko, ikabheje kuiyobhelesheya kwaajogopa a Nnungu, kunapwaa kwa indu yowe, pabha tunabhikwa mmiadi ja pata gumi gwa nnaino, na gwa mobha gakwiyago. <sup>9</sup> Shene shibheleketosho ni sha kulpalika na shinapinjikwa shiposhelwe kwa kaje. <sup>10</sup> Pabha tunakwiabhuya na tumbila kwa ligongo lya genego, tunakwaakulupalila a Nnungu bhakwete gumi, bhaatapula bha bhandu bhowe, na kaje kwa bhaakulupalilanga bhala.

<sup>11</sup> Bhai mwaalajilanje na mwaajiganyanje gene malobhego. <sup>12</sup> Mundu jojowe anannyegaye ga ushanda gwenu, ikabheje mme mmandu bha kagulwa kwa bhaakulupalilanga, muibheleketi na muitendi, na nkupingana, na nngulupai, na nkuikonjeleya. <sup>13</sup> Nnatotoshele kwaashome-langa bhandu Majandiko na lunguya, na kuji-ganya mpaka pushing'ishe. <sup>14</sup> Nnaleshe kutedela liengo shiloi shimposhele kwa bhishilwa

makono na bhanangulungwa, na kwa malobhe ga ukulondola shila.

<sup>15</sup> Ntumbile kutenda genego, nkupinga kwiigongolela kwenu kumanyishe na bhandu bhowe. <sup>16</sup> Muiteije mmayene na majiganyo genu, nnaleshe tenda genego, pabha ntendaga genego shimwiitapule mmayene, na bhakumpilikanishiyangabho.

## 5

### *Malajilo Kubhashitenga na Kubhakongopa na Kubhatumwa*

<sup>1</sup> Nnaakalipile bhakongopa, ikabhe mwaaleyeye mbuti ainabhenu. Na bhashanda mwaaten-delanje mbuti ashaapwenu, <sup>2</sup> bhanabhakongwe bhakongopa, mbuti anyinabhenu, na bhali mbuti ashaalumbu bhenu, nkuikonjeleya mowe.

<sup>3</sup> Mwaalelanje bhanabhakongwe bhalinginji bhashitenga bha kweli. <sup>4</sup> Ikabheje bhashitenga bhakwete bhana eu bhaukulu, bhana eu bhaukulubho, bhaijiganyanje kutenda ipinjikwa na dini kwa ashaalongo ajabhonji nkwaalelanga bhaak-wetenje, pabha genego ni ga pingwa na a Nnungu. <sup>5</sup> Bhai bhakongwe bhali bhashitenga kweli, bhangali mundu jwa kwaajangutila, bhenebho bhashibhika ngulupai yabho kwa a Nnungu, na bhanalonjeya nkwaatindibhalila na nkwaajuga shilo na mui. <sup>6</sup> Ikabheje nshitenga akagulila ilokoli yangali ya mmbone jwenejo awile, nkali alonjeye. <sup>7</sup> Mwaalajilanje genego, nkupinga bhanagambwanje. <sup>8</sup> Ikabheje mundu jojowe alepela kulela ashaalongo ajakwe, yani bhandu bha nnikaja lyakwe, jwenejo

ajikanile ngulupai, numbe jwangali jwa mmbone kupunda mundu jwangali ngulupai.

<sup>9</sup> Bhakongwe bhashitenga bhanajandikwe munkumbi gwa bhashitenga bhakaishile yaka makumi shita, numbe bhabhe bhakongwe bhalombilwe na kamope, <sup>10</sup> na bhalumbililwe itendi ya mmbone, nkulela bhana bhabho ukoto na nkuposhela bhajeninji, na nkwaatendelanga ya mituka bhandunji bha ukonjelo na nkujangutila bhandunji bhalaga, na nkutumbilila kutenda ya mmbone.

<sup>11</sup> Ikabheje bhashitenga bhalinginji bhal, nnaajandikanje, pabha shilokoli sha nshilu shipundaga, shibhalekanje kwaapinga a Kilishitu, nilombwa kabili, <sup>12</sup> penepo shibhaukumulwanje kuti bhashilekanga ngulupai jabhonji ja ntai. <sup>13</sup> Numbe pamo na genego, bhashitenga bha nneyo paatandubha ukata, na kukonangona mmajumba ga bhandunji, na nngabha ukatape, ikabheje na lungw'enyi, na kwijinjiya mmalobhe ga bhananji, akuno bhalibheleketanga ikapinjikwa bheleketa. <sup>14</sup> Bhai nne punguganishiya, bhashitenga bhakanabhe kongopalanga, bhalombwanje na bhakolanje bhana na bhagoyanje nyumba yabhonji, nkupinga ashaamagongo ajetu bhanakolanje sha kutugamba. <sup>15</sup> Pabha, bhashitenga bhananji bhaobhilenje nikunkagula Lishetani. <sup>16</sup> Ikabheje bhakongwe Bhakilishitu, bhakolaga alongo ajabho bhashitenga, bhanapinjikwa kwaajangutila, nngabha kulileshela likanisha lyene liengolyo, nkupinga likanisha likole liengo

lya kwaalelanga bhashitenga bhapundilenje kulaga.

<sup>17</sup> Bhanangulungwa bhatendanga liengo ukoto nnikanisha, inapinjikwa bhalipwanje pabhili, na kaje bhene bhatendanga liengo lya lunguya na jiganya bhala. <sup>18</sup> Pabha Majandiko ga Ukonjelo ganalugula, “Nnantabhe kangw'a ng'ombe alilibhata yalya nkukubhata.” Kabhili, “Nkamula liengo anapinjikwa kupata nshaala gwakwe.” <sup>19</sup> Nnakunde malobhe ga kwaashitakiya bhanangulungwa bha likanisha, gwangali bhaakong'ondela bhabhili eu bhatatu. <sup>20</sup> Bhene bhatendanga ilebho, mwaaleyanje palugwinjili, nkupinga bhananji bhajogopanje.

<sup>21</sup> Ngunakunnajila pa meyo ga a Nnunu na a Yeshu Kilishitu na ashimalaika bha ukonjelo, nkamule gene malajilogi gwangali luagu wala kummika mundu pa ligaa. <sup>22</sup> Nnatende shangu kummishila mundu makono. Wala nnaijinjiye muilebho ya bhananji, mwiiteije nnainyatiye.

<sup>23</sup> Tandubhila nnaino nnangw'e mashipe, ikabheje na divai kashoko, kwa ligongo lya matumbo genu gakumpoteka na ilwele inkulwala lwala.

<sup>24</sup> Yambi ya bhandunji bhana inabhoneka gwangali nng'iyo na inalongolela kuukumu, ikabheje yambi ya bhananji pabhoneka kungai.

<sup>25</sup> Nneyo peyo na itendi ya mmbone, inabhoneka gwangali nng'iyo na nkali gakamanyikago gakaishika.

## 6

### *Bhatumwa*

<sup>1</sup> Bhatumwa bhowe bhanapinjikwanga kwaishimunji bhakulungwa bhabhonji, nkupinga lina lya a Nnungu na majiganyo getu ganatukanwe. <sup>2</sup> Bhatumwa bhalinginji bhakulungwa bhabhonji Bhakilishitu, bhanaanyegayanje pabha ni ashaalongo ajabhonji. Ikabhe, mbaya bhaatumishilanje ukoto, pabha apwaika kwa liengo lyabhonji, ni Nkilishitu nnjabhonji.

*Majiganyo ga Unami na Utajili gwa Kweli*

Nnapinjikwa nnjiganye na nnunguye genega <sup>3</sup> Mundu jojowe ajiganya majiganyo gana ga kanana na gegano, na akaakunda malobhe ga gumi ga Bhakulungwa bhetu a Yesu Kilishitu, wala majiganyo ga dini ja kweli, <sup>4</sup> jwenejo anakwiipuna na wala akakushimanya shoshowe, ikabhe jwenejo ashikola shalubha sha pinga mitau, na malobhe ga nngomo ga kumbuya lupimililo, na mpwai na matukano na nnjimwa, <sup>5</sup> na mitau jangali mpelo jikoposhela kubhandu bhaangabhanikenje lunda, na bhangalinginji ya kweli. Bhaganishiyanga kuti dini mpanda gwa patila utajili.

<sup>6</sup> Ikabheje dini ja kweli jinakumpa mundu kupwaika kaje, atogolelaga na yakwete. <sup>7</sup> Pabha pa shilambolyo twangaika na shindu, na tukajabhula na shindu.

<sup>8</sup> Kwa nneyo tukolaga shalya na nngubho, tutogolele na yeneyo. <sup>9</sup> Ikabheje bhapinganga shipato shikulungwa pagwila mmalinjilo, nitanjila nniyau lya ilokoli ya indu yaigwinji, ya

nyata na ya mboteko ikwaajinjiyang bhandunji nkuobha na nkuangabhanika. <sup>10</sup> Pabha shiumilo shikulungwa sha indu yowe ya nyata, ni kupinjiya ela. Na bhananji nkupinjiya ela bhashilekanga nngulupai, nikwijjweka mm-boteko ya punda.

### *Malajilo kwa a Timoteo*

<sup>11</sup> Ikabheje mmwe, mmandu bha a Nnungu, muiembuye na genego. Nkagulile aki, na kwaatindibhalila a Nnungu, na ngulupai, na pingana, na kwiipililila na kwitimalika. <sup>12</sup> Nkomane ukoto ngondo ja ngulupai, na mpate gumi gwa pitipiti gunshemelwe gula, gumwapatile nkakundeje pa bhaakong'ondela bhabhagwinji. <sup>13</sup> Ngunakunnajila pa meyo ga a Nnungu bhakwiipa gumi indu yowe, na a Yesu Kilishitu, bhakong'ondele ukoto pa meyo ga a Pontio Pilato, <sup>14</sup> kuti nkamule malajilo genu kwa kunda na kulupalika, mpaka lyubha lishibhaishe Bhakulungwa bhetu a Yesu Kilishitu. <sup>15</sup> Na kuika kwabho shikubhe mobha ga pwaa, gabhishilwe na a Nnungu Bhaatagwala jikape, Bhakulungwa bha bhakulungwanji. <sup>16</sup> Ni bhenebho jikape bhakawa, bhatama pashilangaya shikabhandishilwa naka mundu. Wala jwakwapi mundu abhabhweni eu akombola kwaabhona. Bhenebho ni bha ishimiywa, na bhakwete mashili ga tagwala pitipiti! Amina.

<sup>17</sup> Mwaalajilanje bhandunji bhakwetenje utajili pa shilambolyo pano, bhanaipunanje na bhanaikulupalilanje indu ibhakwetenje

ikaakulupalika, ikabhe bhaakulupalilanje a Nnungu, bhakutupa indu yowe kwa ntuka gwabho nkupinga tuinonyele. <sup>18</sup> Mwaalajilanje bhatendanje uguja, bhapundanje kutenda ya mmbone, na bhakolanje ntuka akuno bhaliegwanga kugabhana indu yabbonji na bhananji. <sup>19</sup> Kwaatenda nneyo, shibhaibhishilanje shibhiko sha mmbone kwa mobha gakwiyago. Nkupinga bhapatanje gumi gwa kweli.

<sup>20</sup> Mmwe a Timoteo, nngoye shimmishilwesho. Mwiembuye na nkungulu gwangali gwa mmbone, na mitau ja ungumba ga shene shishemwa lumanyio, mbena unami. <sup>21</sup> Pabha bhananji bhaitapilenje kuti bhakwetenje lumanyio, bhashilekanga ngulupai.  
Ngunakumpinjilanga nema ja a Nnungu.

**Malagano ga Ambi  
Mwera: Malagano ga Ambi (Bible)**

copyright © 2019 Pioneer Bible Translators

Language: Mwera

Contributor: Pioneer Bible Translators

For more information, visit [pioneerbible.org](http://pioneerbible.org) or [twftw.org](http://twftw.org)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

51d0a6af-6aed-51c3-a228-0eefcc772d84